

15. Korrika. Korrika Xtream

Korrikaren 15. edizioa 2007ko martxoaren 22an hasi zen Karrantzan, eta, 2.360 km egin eta gero, apirilaren 1ean amaitu zen Iruñean, non Xabier eta Miren Amuriza aita-alabek irakurri zuten mezua. Heldu! izan zen leloa, eta horrekin batera hainbat azpi-lelo egon ziren: *Heldu hitzari!*; *Heldu lekukoari!*; *Heldu elkarlanari!*; *Heldu Herriari!...*; baina, azken finean, lelo guztiek mezu bera zuten atzean: Heldu euskarari! Omendua, berriz, euskal emakumea izan zen ekitaldi hartan, betidanik euskararen gordeleku izateagatik eta ezinbestekoak izan direlako, etxe askotan, euskararen transmisioa bermatzeko. Azkenik, Niko Etxart egin zen musika-kontuen kargu.

Altzürüküko rockzalearen arabera, “Heldu!” abestia sortzen ari zela 3-4 bat egun eman zituen lorik egin gabe... Istorioa Edurne Brouardekin hasten da, orduko Korrika-arduradunarekin. Edurnek Nikori galdetu zionean ea Korrikarako abestia sortuko ote zuen, abeslariak ez zuen bi aldiz pentsatu eta baiezko arropostua eman zuen. Lehendik, Herri Urrats eta antzeko ekitaldietan ibilia zen, eta kantuaren ardura guztiak bere gain hartu zituen. Alta, kanta grabatzean oso urduri egon omen zen, eta egun haietan ez omen zuen begirik bildu.

Edizio horren inguruan, CSI Korrikak aztarna esanguratsu bat aurkitu du. Bai, bai, primizia bat daukagu! Hauxe da: “Heldu!” bideokliplean, Betagarri taldeko abeslari Iñaki Ortiz de Villalba azaltzen da; eta, kasualitatez, nor arduratu ote zen hurrengo edizioan Korrikaren abestiaz?... Betagarri! Kasualitatea ote?

Jakin badakizue Korrika Txikia aspalditik antolatzen zela; baina ordura arte zerbait falta zen: Korrika Txikirako abesti propioa! Edizio horretan, Pirritx, Porrotx eta Mari Motots pailazoek “Txis pun! Korrika!” sortu zuten. Ez da Korrikaren kanta ofiziala, baina edozein txokotako Korrika Txikiak alaitzen ditu harrezkeroztik.

Badakit Korrikaren istorioak asko gustatzen zaizkizuela; horregatik, Karrantzako hasiera kontatuko dizuet. Martxoaren 22a zen, eta Euskal Herria alarma-egoeran zegoen, elurra zela-eta. Esan bezala, Korrikak Karrantzatik irten behar zuen, eta biharamunean Urizaharreko mendatea zeharkatu behar zuen Arabako Errioxara iristeko. Elurraren erruz, errepidea itxita zegoen ibilgailu guztientzat; halere, antolatzaileek espero zuten Arabako Aldundiak errepidea garbituko zuela.

Korrika jada abian zela, bat-batean konturatu ziren mendatearen kilometro batzuk Errioxako lurraldean zeudela. Akabo bakea! Bertako Diputazioari abisu eman zioten, eta Korrika pasatu zenean, garbi-garbi zegoen ibilbide osoa. Dena den, berriro Araban sartu zirenean, errepidea elur azpian desagertu zen. Korrika animatzen zuten autoetan kateak jarri zituzten, baina elur-erauntsia ez zen baretzen, eta tontorrera iristeko 24 kilometro falta zirela, atzera egin behar izan zuten; edonola ere, korrikalari eta antolatzaile batzuek gorantz jarraitu zuten elur artean, eta lekukoa mendatearen bestaldera eramatea lortu zuten. Korrikalari haiei esker, Korrikak aurrera segitu zuen.

Tira, saio hau amaierara heldu da. Hurrengo atalean, CSI Korrika taldeak berebiziko ikerketa egingo du Rami nor den ikertzen; ezagutu nahi duzue? Ez huts egin hurrengo atala; bitartean, txintxoak izan. Agur, eta ondo izan!